

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ
ԱՇԽԱՏԱԿԱՐԳԱՅԻՆ ՈՐՈՇՈՒՄԸ**

**«ԲԻ ԼԱՅՆ» ՍՊԸ-Ի՝ ՍԱՀՄԱՆԱԴՐԱԿԱՆ ԴԱՏԱՐԱՆՈՒՄ 28.10.2009Թ. ՄՈՒՏՔԱԳՐՎԱԾ
ԹԻՎ 4-277 ԴԻՄՈՒՄԸ ՔՆՆՈՒԹՅԱՆ ԸՆԴՈՒՆԵԼՈՒ ՄԱՍԻՆ**

ՀՀ սահմանադրական դատարանը համաձայն «Սահմանադրական դատարանի մասին» ՀՀ օրենքի 69 հոդվածի 8-րդ մասի և ՀՀ սահմանադրական դատարանի կանոնակարգի 26 հոդվածի 5-րդ մասի՝ աշխատակարգային նիստում քննելով ՀՀ քաղաքացիական դատավարության օրենսգրքի 226 հոդվածի, 233 հոդվածի 2-րդ մասի, 233 հոդվածի, 231 հոդվածի 1-ին մասի 4-րդ կետի, 233 հոդվածի 1-ին մասի 1-ին կետի, 234 հոդվածի 1-ին մասի, 234 հոդվածի 3-րդ մասի, 241.1 հոդվածի 1-ին մասի 6-րդ կետի, 241.3 հոդվածի՝ Հայաստանի Հանրապետության Սահմանադրությանը համապատասխանության վերաբերյալ «ԲԻ ԼԱՅՆ» ՍՊԸ-ի դիմումը քննության ընդունելու մասին հարցը, **ՊԱՐԶԵՑ.**

1. «ԲԻ ԼԱՅՆ» ՍՊԸ-ն դիմել է սահմանադրական դատարան՝ վիճարկելով ՀՀ քաղաքացիական դատավարության օրենսգրքի 226 հոդվածի, 233 հոդվածի 2-րդ մասի, 233 հոդվածի, 231 հոդվածի 1-ին մասի 4-րդ կետի, 233 հոդվածի 1-ին մասի 1-ին կետի, 234 հոդվածի 1-ին մասի, 234 հոդվածի 3-րդ մասի, 241.1 հոդվածի 1-ին մասի 6-րդ կետի, 241.3 հոդվածի սահմանադրականությունը:

2. ՀՀ Սահմանադրության 101 հոդվածի 6-րդ կետում նախատեսված է, որ սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, սպառվել են դատական պաշտպանության բոլոր միջոցները և վիճարկում է այդ ակտով **իր նկատմամբ կիրառված** օրենքի դրույթի սահմանադրականությունը:

Դիմողի կողմից վիճարկվող՝ ՀՀ քաղաքացիական դատավարության օրենսգրքի 241.3 հոդվածը դիմողի նկատմամբ չի կիրառվել:

3. «Սահմանադրական դատարանի մասին» ՀՀ օրենքի 32 հոդվածի 3-րդ կետի համաձայն՝ սահմանադրական դատարանը գործի քննությունն ամբողջությամբ կամ մասամբ

մերժելու մասին որոշում է ընդունում, եթե դիմումում առաջադրված հարցի վերաբերյալ առկա է սահմանադրական դատարանի որոշումը:

Դիմողի կողմից վիճարկվող՝ օրենսգրքի 233, 234 հոդվածների, 231 հոդվածի 1-ին մասի 4-րդ կետի վերաբերյալ առկա են սահմանադրական դատարանի ՄԴՈ-690, ՄԴՈ-754, ՄԴՈ-765 որոշումները:

4. «Սահմանադրական դատարանի մասին» ՀՀ օրենքի 69 հոդվածի 7-րդ մասի համաձայն՝ անհատական դիմումների քննությունը կարող է մերժվել այն դեպքերում, երբ անհատական դիմումն ակնհայտ անհիմն է: Ըստ 2009թ. մարտի 17-ի ՄԴԱՈ-21 որոշման մեջ ՀՀ սահմանադրական դատարանի արտահայտած իրավական դիրքորոշման՝ անհատական դիմումն ակնհայտ անհիմն է, երբ, թեև դրանում բարձրացված հարցը ենթակա է սահմանադրական դատարանի քննությանը, այնուամենայնիվ, դիմումում չեն բերվում բավարար իրավական փաստարկներ այն հիմնավորելու համար:

Դիմողն օրենսգրքի 226 հոդվածի սահմանադրականությունը վիճարկում է այն առումով, որ այն՝ որպես վճռաբեկ բողոք բերելու հիմք չի նախատեսում «... անձանց հիմնարար իրավունքները սահմանափակելու, Սահմանադրության 92-րդ հոդվածի պահանջների ամբողջական կատարումը չապահովելու՝ օրենքի ոչ միատեսակ կիրառության դեպքերը և ոչ միատեսակ կիրառության հնարավորությունը որպես վճռաբեկ բողոք ներկայացնելու հիմք ...»:

Օրենսգրքի 226 հոդվածի 1-ին մասով նախատեսված՝ վճռաբեկ բողոք բերելու հիմքի և օրենսգրքի 227 հոդվածի համադրված ուսումնասիրությունը վկայում է, որ դիմողի կողմից մատնանշված վերոհիշյալ հիմքն ըստ էության 226 հոդվածի 1-ին մասում նշված ընդհանուր հիմքի շրջանակներում է և հանդիսանում է նյութական կամ դատավարական իրավունքի խախտման դրսևորում: Ուստի՝ վճռաբեկ բողոք բերելու նշված հիմքն առանձին դրույթով ամրագրելն օրենսդրական տեխնիկայի հարց է, և այդ առնչությամբ սահմանադրաիրավական վեճ չի առաջանում:

Դիմողը, ի հիմնավորումն 241.1 հոդվածի 1-ին մասի 6-րդ կետում ամրագրված դրույթի հակասահմանադրականության, մատնանշում է այն հնարավոր բացասական հետևանքները,

որոնք կարող են առաջանալ այդ դրույթում՝ օրենքի կամ միջազգային պայմանագրի կոնկրետ դրույթը վճռաբեկ դատարանի որոշման մեջ մատնանշելու պահանջի բացակայության պայմաններում: «Իրավական ակտերի մասին» ՀՀ օրենքի 43 հոդվածի 3-րդ մասի համաձայն՝ Հայաստանի Հանրապետության Սահմանադրության և օրենքների մասերին հղում կատարելիս նշվում են ակտի կրճատ անվանումը, ակտի հոդվածի հերթական համարը, իսկ անհրաժեշտության դեպքում՝ նաև հոդվածի մասի համարը, հոդվածի մասի կետի համարը: Իրավական այլ ակտի մասերին հղում կատարելիս նշվում են իրավական ակտի կրճատ անվանումը, կետի համարը:

Դիմողի փաստարկները, ըստ էության, վերաբերում են վիճարկվող նորմի՝ իրավակիրառական պրակտիկայում դիմողի մատնանշած հնարավոր մեկնաբանությամբ կիրառման իրավական հետևանքներին: Մինչդեռ դիմողի կողմից չի ներկայացվել նման իրավակիրառական պրակտիկայի վերաբերյալ որևէ փաստ: Ավելին, «Իրավական ակտերի մասին» ՀՀ օրենքի նշված իրավակարգավորման պայմաններում իրավական ակտն ընդունող մարմինն ըստ էության անհրաժեշտության դեպքում հղում է կատարում օրենքի կամ այլ իրավական ակտի համապատասխան հոդվածներին, դրույթներին:

Ղեկավարվելով «Սահմանադրական դատարանի մասին» ՀՀ օրենքի 32 հոդվածի 3-րդ կետի, 69 հոդվածի 1-ին և 7-րդ մասերի պահանջներով՝ Հայաստանի Հանրապետության սահմանադրական դատարանը **ՈՐՈՇԵՑ**.

«ԲԻ ԼԱՅՆ» ՍՊԸ-ի դիմումի քննության ընդունումը մերժել:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՍԱՀՄԱՆԱԴՐԿԱՆ ԴԱՏԱՐԱՆԻ
ՆԱԽԱԳԱՀ**

Գ. ՀԱՐՈՒԹՅՈՒՆՅԱՆ

20 նոյեմբերի 2009 թվականի
ՍԴԱՌ-102